

13-D17-Sy أنت بس ارجع!

- 1 عماد: ألو! مرحبا غسان. كيفك؟ شو أخبارك؟
- 2 غسان: أهلين عمادو! كيفك أنت؟ نحنا كتير مناح الحمد لله. وإنت
- 3 كيف أحوالك؟ شو أخبار شغلك؟
- 4 عماد: أنا كتير منيح. الحمد لله. بس أخبار شغلي مو منيحة.
- 5 غسان: ليش؟ خير إن شاء الله.
- 6 عماد: والله الشركة اللي بشتغل فيها قررت تفصل عشرة بالمائة من
- 7 الموظفين. وأنا واحد من اللي رح تفصلهن الشركة.
- 8 غسان: له له له! شو هالخبر هاد؟ طيب وشو السبب؟
- 9 عماد: يعني مثلما بتعرف، الحالة الاقتصادية بأميركا تعبانة كتير.
- 10 وفي شركات كتيرة عم تفصل موظفيها.
- 11 غسان: طيب وشو رح تعمل هلاً؟ ما ممكن تلاقي وظيفة بشركة تانية؟
- 12 عماد: يعني. بظنّ ممكن لاقى وظيفة. بس أنا عم فكر أرجع على
- 13 سوريا.
- 14 غسان: شو هالحكي هاد؟ في حدا بيكون عندو وظيفة بأميركا وبيفكر
- 15 يرجع على سوريا؟
- 16 عماد: بيني وبينك، تعبت من الغربة. وبعدين ما بدي روح من وظيفة

- 17 لوظيفة، ومن ولاية لولاية. بدي استقرّ وأعمل شغل خاص. والوظيفة
18 هون ما إلها مستقبل.
- 19 غسان: والله معك حق. وأنا كمان عملت شغل خاص صغير
20 عالإنترنت. والحمد لله كلو تمام.
- 21 عماد: والله هاي أخبار حلوة كثير. طيب وظيفتك القديمة، خلصت
22 منها؟
- 23 غسان: لا، شو خلصت مهنا؟ أنا بعدني عم بشتغل بنفس وظيفتي
24 القديمة. بس هاد شغل إضافي.
- 25 عماد: برافو عليك. طيب، يعني برأيك، في فرص مناسبة للشغل
26 بالشام؟
- 27 غسان: أنا بظنّ إنو إذا الواحد معو مصاري ففي فرص كثير مناسبة.
28 وأنا بشجعك على إنو ترجع وتستقرّ هون. وأنا معك إذا بدك أية
29 مساعدة.
- 30 عماد: يسلم إيديك. إنت ما في متلك.
- 31 غسان: عمادو، إنت بس إرجع وكل شي هون حيكون تمام بإذن الله.
- 32 عماد: طيب. برجع بحكي معك.
- 33 غسان: طيب. ماشي.
- 34 عماد: باي.
- 35 غسان: باي.